



EDITORIAL

Atuhan an Oplan Kapanatagan ngan an terorismo han estado

Hadin Oktubre, gin-anunsyo han 8th Infantry Division ngan Philippine National Police-Regional Office (PRO)-8 an mas mahugot nga bubuligay agud puyuyon an "insurhensiya" ha rehiyon. Paggiuson han militar an kapulisan ha mga operasyon kombat ngan operasyon nga Retooled Community Support Program (RCSP) ha kabaryuhan. Pagpatuman ini han Oplan Kapanatagan han nasyunal nga gubyrno, nga nakabasar ha "bug-os nga nasud nga daup" diin ngatanan nga sanga han gubyrno gin-gagamit para ha kontra-insurhensiya.

Tungod kay "prayoridad nga erya" an Eastern Visayas ha kontra-insurhensiya, diri na la AFP kundi aktibo liwat an PNP ha todo-gerra han rehimen Duterte. Mga pwera han AFP-PNP an nangistraping ha usa nga pamilya ha Palapag, Northern Samar ngan pumatay ha retirado nga kumander han Bagong Hukbong Bayan nga hi Salvador "Ka Bulig" Nordan. Iligal nira nga gin-aresto an Tacloban 5, ngan bisan an mga maiha na nga retirado ha ligal nga pakigbisog ngan nagpahuway na ha serbisyo ha BHB. Aktibo na an PNP ha RCSP, ha kampanya nga pagpasurender ha ranggo han BHB ngan ha kontra-komunista nga saywar.

Dugang nga kusog an gin-gagamit ni Duterte para ha ngatanan-nga-gapil nga pagpuyoy ha katawhan. Tungod kay natikahiluag an kangalas han katawhan ha iya, dugang niya nga gin-gagamit an ngatanan nga rekurso para ha mas madarahug nga terorismo han estado kontra ha ngatanan nga klase han oposisyon. Lauman an mas brutal ngan direkta nga pangatake diri la ha BHB kundi sugad liwat ha mga ordinaryo nga sibilyan, ha mga patriyotiko ngan progresibo nga organisasyon ngan ha hiluag nga oposisyon.

Kinahanglan himuon an ngatanan nga porma han pakig-away agud pakyaan an Oplan Kapanatagan ngan an terorismo ni Duterte. Ipasulong an armado nga pakig-away ngan suportahan an BHB ha paglansar han mga taktikal nga opensiba kontra ha pinaka ginkakangalsan nga elemento han AFP-PNP. Ilansar an mga panmasa nga pakigbisog kontra ha kakablasan ngan pasismo agud mapukaw hira ha katukmaan han gerra han katawhan ngan maaghat hira nga magkabisog. Kabigon an pinakahiluag nga opsision nga natipa ha pagpapakuri ngan panraugdaug ni Duterte, ngan pagiuson an ngatanan agud patalsikon hiya ngan tapuson an iya tiraniya.

Parag-uma, ginpatay han 46th IB

USA NA LIWAT nga parag-uma ha Western Samar an pinakaurhi nga biktima han ekstrahudisyal nga pagpatay han mga berdugo han 46th Infantry Battalion.

Ginpatay han mga sundalo hi Tedito Cabaljao, masobra 50 anyos, residente han Brgy. Magdawat, Pinabacdao, ha iya umhanan hadin Oktubre 24.

Ha sumat han BHB-Arnulfo Ortiz Command, gin-gamaan hi Cabaljao han mga elemento han 46th IB nga maiha na nga nagpasurender ha iya. Tikang pa hadton 2019 nakakampo an mga sundalo ha iya baryo agud maghimo han operasyon nga kombat-paniktik-saywar ha tahub han RCSP. Tungod ha ira pan-gigipit, napiritan hiya nga umukoy ha iya umhanan.

Hi Cabaljao an ikalima nga parag-uma nga ginpatay han 46th IB yana nga tuig.

OPLAN KAPANATAGAN
(2019-2022)

Joint Campaign Plan han **AFP-PNP** para ha mas mahugot nga **burubligay** ha gerra kontra-insurhensiya.

Dalan han gerra han katawhan

Ho Chi Minh Trail, nagpamatuod han kusog han masa nga Viet

An ginerilya nga pakiggerra, ha esensya, usa nga pinakahitaas nga porma han panmasa nga pakigbisog kontra ha usa nga matiyupion ngan matalumpiguson nga kaaway. Ha mga ginlansar nira nga gerra han pagdepensa kontra ha mga langyaw nga mananakop hadton ika-20 siglo, ginpakita han katawhan han Vietnam nga ha marayhak nga kagiusan masa nakasarig an kadaugan han ira pakiggerra.

Hadton 1954, nababahin ha duha an nasud Vietnam: an norte nakatukod han usa nga sosyalista nga gubyerno ngan nakagdepensa han kalugaringon kontra ha kolonyalismo nga Pranses, samtang an sur nakikiggerra ha imperyalismo nga US ngan ha usa nga niyutiyo nga gubyerno.

Importante kaupay nga mabuligan han Norte an Sur agud matalwas an bug-os nga Vietnam. Nakita nga estratehiko nga linya han komunikasyon an dalan ha Truong Son, usa nga bubkiron nga nasumpay ha norte ngan sur han Vietnam ngan nadugtong ha mga karaknit nga nasud nga Laos, Cambodia, ngan Thailand. Yawe ini nga dalan ngan damo an guba, salog, bukid, ngan kweba hini nga mga natural nga komoplahe.

Tikang han una nga gamiton hadton 1959, dirudiretso ini nga napauswag komo usa nga sistema han mga kalsada, riles, aragian han tubig, istasyon han militar, baraks, istakan han suplay, ngan medikal nga pasilidad. Inabot ha 20,000 kilometro an kahilab-on hini. Dinhi ginpasakob an gatos kayukot nga mangaraway, armas ngan suplay tikang ha norte para ha pakig-away para talwason an Sur hadton 1975. Dako ini nga kadaugan han katawhan Viet ha butnga han waray wantas nga panmomba han US.

Kagiusan masa para ha gerra

Usa nga higante nga paningkamot diri la han hukbo kundi sugad liwat han katawhan Viet an pagmentinar han Ho Chi Minh Trail. Mayda 20 milyon katawo tikang ha 30 nga katutubo nga minoriya an naukoy ha Truong Son. Napagios hira tikang ha paghawan han dalan tubtub ha pagpapauswag ngan pagmentinar han maabot 20 nga istasyon militar. Kabakyang han hukbo an kabatan-unan ngan kalahingan, kalalakin-an ngan kababayinan, mga pamilya ngan mga baryo ha pagtransport han suplay ngan armas, konstraksyon, pangayad han mga sarakyan, pagpapakaon, pagpapahigda ngan paggiya ha mga naagi nga tropa.

Nabulig hira ha iskawting, pagdepensa kontra ha mga bomba ngan idro han kaaway, ngan serbisyo medikal.

Grabe an ira nagin sakripisyo para ha pagtransport han suplay. Han una, mga bisikleta, karabaw, o diri ngani tawo an napas-an han tone-tonelada nga bugas, bala, gasolina ngan iba nga suplay. Mga lahing nga kalalakin-an an kaagsuban nga nagdadara tungod kay nakaserbisyo ha hukbo an kadam-an han mga kabatan-unan nga diri menor de edad, bisan an kababayin-an. Waray mag-ihaha, nagkon-strak hira han mga kalsada para ha mga trak. Hadton 1968, maabot 10,000 nga trak an dudrungan nga nakakabyahe dinhi. Nahimo liwat an 5,000 kilometro nga sistema nga patubo para ha pagtransport han gasolina.

Dako an nagin amot dinhi han mga kabatan-unan. Burubatalyon han mga "taliba nga kabatan-unan" an nakon-strak han kalsada ngan natransport han suplay. Nabulig liwat hira ha pagbantay ha kahanginan, pagmapa han mga ginhuhulog nga bomba han kaaway, ngan paggiya ha mga nabyahe nga trak ha gab-i. Kilalado liwat hira ha dagmit nga pag-ayad han mga nabomba nga istruktura. Kaupod an mga yunit milisya, nakapusisyon hira ha mga lugar nga agsub bombahon diin mayda na nakaandam nga materiyales ngan higamit agud dagmit hira nga makaresponde.

Sikreto nga paggios han ngatanan

Pinaagi han sikreto nga paggios, ginpakyas han Ho Chi Minh Trail an grabe nga panmomba han US, diin kada pito kaminuto ini ginhuhulugan han



bomba. Ha tinikangan pa la mahirot na an operasyon dinhi han hukbo ngan katawhan. Han una nga gin-gagamit an dalan, mahirot nira nga ginhahawan han mga naagi an mga dahon ngan kahoy agud diri mawara an natural nga kober han guba. Ha luyo han pagdamo han aktibidad ha dalan, nagpabilin nga madakmol an komoplahe hini. Kun diin waray o manipis an komoplahe, makurimot nga nakuha han sighot tikang ha iba nga lugar agud tahuban ini. An mga tulay nga naagi ha salog ginhihimo ha ilarum han tubig agud diri makita tikang ha kahanginan. An mga gin-gagamit nga baloto gintatahuban han dahon ha aga ngan gintatanggal kun gagamiton ha gab-i. Ginbutangan han komoplahe bisan an mga trak ngan tropa nga naagi.

Maungod nira nga ginpakyas an paniniktik han kaaway. Hin maghulog an US han mga sensor nga nakakadetect han tunog ngan amyon han tawo, ginruruba nira ini, gintatanggalan han baterya, ginpatutukan han recording han mga naandar nga sarakyan, ngan ginpapatamak-tamakan ha mga karabaw. Kun mayda nagama nga kaaway, nagkakaradol hira han kaldero agud ipahibaro ha hukbo. █